

2 کورینتوس

سورت کیریمن یغ کدوا هق توهن بری فولوس
تولیس کفد فواق المسیح دبندر کورینتوس

باب 1 فولوس جانی سئورغ هق باوا تیتہ المسیح

- 1 اکو فولوس، سئورغ دالم فواق هق باوا تیتہ عیسی المسیح
ایکوت کهنندق توهن، تولیس سورت کیریمن نی، سکالی دغن
ادیق کو تیموتیوس، کفد اورغ ۲ دالم فواق المسیح دبندر کورینتوس
فس کفد اورغ ۲ هق جانی میلیق توهن سرات نکری احیا.
- 2 اکو مینتاء توهن باف کیت دغن ربی عیسی المسیح تورون
رحمة اتس فواق مو دغن سلامت سجهترا.

فولوس اوچف. شکور کفد توهن

- 3 اوہ فوجیلہ کا توهن هق جانی باف عیسی المسیح، ربی
کیت، باف هق کسایغ بلس سعمور! سموا فرتولوغن، اصل
ماری دتوهن نیلہ.
- 4 تغه ۲ کیت دوق دالم کسوساهن، نی تولوغ بنتو کیت، نق
بری کیت بولیہ تولوغ بنتو اورغ ۲ مان هق دوق سوسه کاتیق،
سرورف توهن تولوغ کیت دولو.
- 5 کران، بالس مان اکو جوغ پتریم کسوساهن المسیح، هق ملیمفه
باپق تو، بالس تولہ جوگ، اکو بولیہ تریم درفد توهن،

- فرتولوغن هق ملیمغه کا کیت کوء جالن المسیح.
- 6 کالو اکو کنا سوسه، اکو دوق سوسه تو انتوق نق تولوغ مو بری بولیه سلامت. کالو اکو تریمه فرتولوغن توهن نق بنتو هاتی کو، هق تو فون نق تولوغ مو جوگ، بری هاتی مو تگوه، بولیه اود دغن صبر، کسوساهن سروف هق اکو.
- 7 سبب توله، هرافن کو چارا حال فواق مو تاء برگوپغ، سابیت اکو تاهو دغن یقین کات، بالس مان فواق مو امبیق کسوساهن سروف اکو، بالس تو جوگ، مو بولیه امبیق فرتولوغن درفد توهن، سروف هق اکو تریمه تو.
- 8 هی ادیق برادیق! اکو نق بری مو ایغت چارا حال کسوساهن هق اکو تمو، تکه اکو دوق دالم کلیواسن اسیا دولو. کران کسوساهن ۲ تو برت سوغگوه، تیندیه اکو، سهیغگ براس نق کفیق، تاء ۱۰ هرافن نق هیدوف لاگی.
- 9 اکو براس سروف حکوم ماتی جاتوه اتس اکو ده، تافی سسوگگوهن، فرکارا تو جایی، نق بری اکو کابر کات، تاء کنا برگنتوغ کا دیری سندیری، تافی کنا برگنتوغ دغن توهن ساج، هق ۱۰ کواس بولیه بری اورغ ماتی هیدوف کلیق.
- 10 یی بری اکو سلامت ده درفد بهیا هق تروق سمفی ماتی تو، فس کوء دافن، یی نق بری اکو سلامت فول. بالس تو، هرافن کو اتس یی تگوه کات، یی نق بری سلامت کا اکو کوء دافن سمولا فول.
- 11 فواق مو سموا کنا فاکت مینتاء دعا انتوق اکو گاتیق. کهور بایق اورغ مینتاء دعا بالس تو، کهور بایق لاگی اورغ ۲ هق بولیه لغئق کفلا اوچف تریمه کاسیه کا توهن، بیلا سمفی فرکارا هق فواق مو دوق مینتاء تو.

سوارا هق کات نق سلسي تو، بوليه فرچاي

- 12 ار ساتو فرکارا هق بري اكو بسر هاتي، هق فراسان هاتي
کو ستوجو کات سوڱو، ياءيت اكو برهوبوڱ دغن سمو اورڱ،
فس هق فالين مستحق، دغن فواق مو، دغن هاتي اخلاص هق
اصل ماري دتوهن. فس توهنله، دغن رحمة دي، بري جادي
بالس ني، بوکن فرکارا ني جاني دغن گنداين کو سنديري، نق.
- 13 دالم سورت مان ۲ هق اكو کيريم کا فواق مو تو، تاءار سيکيت
هابوق هق کنا فهم کو لائين. هق مو بوليه باچ، مو فهم بالس
14 تو. فس اكو هارف کات مو نق بوليه کهور ۲ کدل دغن اكو، ولو
کدل سيکيت لاني فون، انتوق بري فواق مو بوليه براس بسر
هاتي حال اكو، سروف اكو نق براس بسر هاتي حال فواق مو،
فد هاري ربي عيسى نق ماري نون.
- 15 دغن سابيت فراسان هاتي کو تنتو چارا حال فرکارا ۲ سائي،
توجوان هاتي کو نق کي کا تمفت مو دولو تو، نق بري مو بوليه
16 تريما رحمة دوا کالي گندا، ياءيت اكو نق برادو دتمفت مو
تغه جالن کي کا نکري ماكدونيا، فس هالا کليق، نق برادو فول،
بري مو فلواغ بوليه هنتر اكو کي کا نکري يهوديه.
- 17 بيلا اكو چارڱ نق بوات بالس تو، مو گامق کات توجوان هاتي
کو تاءانتو که؟ مو براس کات اكو بوات چاداغن ايکوت فيکيران
هاتي کو سنديري دغن تاءانتو که؟ هق سبنتر کات: نق سلسي!
هق سبنتر لاگي کات: تاءسير سلسي!
- 18 بالس مان اكو بوليه ناءيك سقسي کات: توهن هق سبنر، بالس
تو جوگ، اكو بوليه ناءيك سقسي کات، هق اكو جنجي دولو تو
هق سبنر جوگ، بوکن دغن توبيت سوارا دوا بغسا سکالي،
کات نق سلسي، سبنتر لاگي، تاءسير سلسي.
- 19 سيلس، تیموتیوس دغن اكو فولوس ني، بياس رويت کا فواق مو

- 20 حال عیسی المسيح انق توهن، فس عیسی تاء سروف اورغ هق
توبیت سوارا روا بغسا تو، دق! عیسی له جادي سوارا توهن
هق کات: نق سلسي! کران اف۲ هق توهن جنجي کا ماءنسي
عیسی له هق جامین کات: سلسي ده! سابیت توله، کیت
بولیه سبوت: امین! اتس نام عیسی تو، معنا کیت ستوجو
ده. بالس تو، توهن نق بولیه فوجین درفد کیت.
- 21 جادي توهنله هق جامین کا اکو دغن فواق مو کات، کیت دوق
سمهاتي سپاوا دغن المسيح. توهنله هق سوده فیلیه کیت،
- 22 فوکول تندا کات کیت جادي ملیق دي، فس تندا تو یاءیت،
بي بري روح دي دوق دالم هاتي کیت، فس تندا ني جامین
سموا هق دي نق بري کا کیت کوء دافن.

فولوس تاء سیر بري فواق کورینتوس براس هاتي

- 23 توهن هق تاهو ایسي هاتي کو، بولیه جادي سقسي کات،
سبب اکو تاء سیر بري فواق مو دکورینتوس براس هاتي، سابیت
تو اکو اوبه تاءکي کا تمفت مو.
- 24 بوکن کات اکو نق فقسا مو دالم حال اف۲ هق مو کنا فرچاي،
کران ایمان مو دوق کجت ده. تافي اکو نق امبیق فدولي کا
فواق مو، نق بري مو کهور لبیه سوک هاتي لاکي.

باب 2

- 1 سابیت تو اکو کرت سین کات، تاء کنا کي تیغوق مات مو
ساللو، تاکوت نق بري فواق مو سديه هاتي.
- 2 فس کالو اکو بري فواق مو سديه هاتي، سیاف فول نق بري
هاتي کو سنغ کوء دافن؟ تنتو تاءار، ملیکن فواق مو هق
اکو بري سديه تو!
- 3 جادي سبب توله اکو هنتر سورت تو کا فواق مو، نق بري
تنتوکات، بیلا اکو سمفي ده، فواق مو هق سوغ بري اکو

سوڪ هاتي، تاء ڪنا بري اڪو سوسه هاتي. ڪران فواق مو سموا
تاهو ده بوڪن، ڪات اڪو تاء سوڪ هاتي، ڪالو فواق مو تاء
سوڪ هاتي ڪاتيقي؟

4 سورت ڪيريمن دولوتو، اڪو توليس توبيت رالم هاتي هق
سرابوت ساغت، سمفي ڪا اير مات منيليه فون. بوڪن نق
بري مو سديه هاتي، رق، تافي نق بري مو ڪابر ڪات ستارا
مان اڪو ڪاسيه ڪا فواق مو.

ڪنا معاف ڪا اورغ هق بوات ساله تو

5 اڊ جوگ، سئورغ رالم فواق مو، هق بري جاني سبب
اورغ ۲ سديه هاتي. بوڪن ڪا اڪو، رق. تافي بوليه ڪات ري
بري سديه هاتي بايق اورغ جوگ رالم فواق مو. اڪو تاء سير
6 تمبه ڪيچيقت برت فد تو. فادن ده انتوق اورغ تو، حڪوم
هق بايق اورغ رالم فواق مو فاکت بري جاتوه اتس ري.
7 لاني، موليق لاکي ڪالو مو فالينغ معاف ڪا ري، بري هاتي ري
قواة فول، تاڪوت ري نق لمس رالم ڪسوساهن بايق ڪيتو
8 لالو تو. سابيت تو، اڪو مينتاء جوگ ۲ دغن فواق مو،
تنجوقله ڪات مو ڪاسيه ڪا ري لاکي.

9 جاني سبب نيله، اڪو توليس سورت ڪغد مو، ياءيت اڪو اوجي
مو، نق تاهو ڪات فواق مو جوغ ڪا رق، توروت فرينته ڪو،
سعمور.

10 اورغ مان ۲ هق فواق مو امفون، اڪو فون امفون جوگ، فس،
ڪالو اڊ ڪسلاهن مان هق اڪو ڪنا امفون، اڪو امفون ده،
دافن المسيح، انتوق نق بري فواق مو بوليه فائده.

11 تاء سير بري هييليس اڊ چله بري ڪيت هاله ڪا ري، ڪران
ڪيت تاهو ده، بالس مان ري نق تيفو ڊاي سعمور.

کیت بولیه برجای دغن کواس المسیح

- 12 بیلا اکو سمفي ده کا بندر ترواس، دغن توجوان نق رویت
خبر بایک حال المسیح، ربی بوک ساتو جالن بری اکو بولیه
- 13 بوات کرج تو دسیتو. تافی اکو براس سوسه هاتی سبب اکو
چاری ۲ تاء تمو دغن ادیق کو تیتوس. اکو فون بری سلامت
تیغل کا اورغ ۲ دسیتو، فس برجالن کی لاکي کانگری ماکدونیا.
- 14 تافی اوچف شکور کا توهن! تکه کیت دوق سهاتی سپاوا
دغن المسیح، بی بری کیت بولیه بلارق سعمور، دالم باریس
المسیح هق منغ. فس بی فاکي کیت نق بری خبر بایک حال
بی سریق کی رات ۲، سروف باءو سدف.
- 15 باءو سدف خبر بایک هق المسیح تو، تندا کات توهن دوق
رافت. فس باءو تو سریق سمفي کا اورغ ۲ هق نق سلامت.
سمفي جوگ کا اورغ ۲ هق سست نق بناس.
- 16 کا اورغ ۲ هق نق بناس تو، باءو تو جانی تندا کات، بی نق
ماتی. کا اورغ ۲ هق نق سلامت فول، باءو تو جانی تندا کات
بی نق هیدوف. تاء ار اورغ ار کواس بولیه تغوغ کرج نی.
17 کیت نی، تاء سروف بایق اورغ لاین، هق کی کوسنر خبر
توهن سروف جوال بارغ مور. نق! کیت باوا تیته توهن،
فس رویت خبر بایک دغن هاتی اخلاص، اورغ هق کنا
تغوغ جواب کا توهن، کران کیت دوق سهاتی دغن المسیح.

فرهو بوغن بارو توهن دغن مانیسی

باب 3

- 1 هق مو دغر ساء نی تو، ارکه هق بوپی کات اکو نق
اغکیت دیری کو؟ بغکالی مو ایغت کات، اکو کنا ار سورت
جامین فوجی، نق بری فواق مو سمبوت اکو، اتوا کنا امبیق
سورت دفواق مو، بری اکو برانی کی کا اورغ لاین. دق!

- 2 فواق مو سندیري جاري سرورف سورت جامین اکو هق تولیس
ده دهاتی کو، هق سموا اورغ بولییه تاهو، بولییه باچ.
- 3 سوده چرف ده کات، المسیح سندیري هق تولیس سورت
جامین کو تو. سورت نی، بوکن تولیس اتس کفیغ ۲ باتو، تافی
تولیس دهاتی مانیسی، دغن روح توهن هق هیدوف سعمور.
- 4 اکو بولییه کات بالس نی، کران هرافن کو توجو کا توهن کو
5 جالن المسیح. دالم یری کو سندیري، تاء اد اف سکارا، یری
اکو بولییه مفاکو کات اد کواس نق بوات کرج نی. سموا هق
یری اکو اد کواس تو، ماری دتوهن بلاک.
- 6 دیاله هق یری اکو فندی دالم کرج تنتغ فرهوبوغن هق بارو،
توهن دغن مانیسی. فرهوبوغن نی تاء برگنتوغ فد حکوم ۲ هق
تولیس دباتو تو دولو، تافی برگنتوغ فد کرج روح توهن.
حکوم دولو تو باوا کا جالن ماتی، تافی کرج روح توهن باوا
کا جالن هیدوف.
- 7 حکوم ۲ تورات هق توهن تورون تو، حروف دی فاهت اتس
کفیغ ۲ باتو. تکه تو جوگ، توهن یری نمفق کملیان نی، لکت
چهییا چره دموک نی موسی. سوغکوه فون چهییا کملیان تو
کهور ۲ تاء چره، تافی دوق بچر لاکي، چوکوف یری فواق
اسرائیل نق تیغوق کا موک موسی تاء لیه. کالو تورات، هق
نق باوا یری ماتی تو، تورون دغن کملیان بسر کیتو لالو،
تنتوله نق بسر لاکي، کملیان تنتغ دغن کرج روح توهن !
- 8 اد کملیان بسر هق ماسوق دغن تورات هق کات مانیسی
9 ساله کنا ماتی تو. تنتو نق بسر لبیه ۲ لاکي، کملیان هق
ماسوق دغن کرج روح توهن، هق کات مانیسی نق بولییه
سلامت.
- 10 کملیان هق تیمبول لانی بسر لاکي، نق بندیغ تاء لیه دغن
کملیان هق کات بسر دولو تو. معنان، هق دولو تو هیلغ

- 11 ده لاني. هق ډولو تو اد کلميان جوگ، تافي ليسوس ده. کالو کيتو، هق لاني، هق تاهن سلام ۲، تنتونق اد کلميان لبيه ۲ لاکي.
- 12 دغن سبب هرافن نيله، کيت جادي براني.
- 13 کيت تاء سروف دغن نبي موسی، هق کنا فاکي کائين کلوبوځ تودوځ موک، تاء سير بري فواق اسرائيل تيغوق چهيا تو کهور ۲ هيلغ کي.
- 14 فيکيران فواق تو کاتوف ده. سمفي لاني فون، افبيل دي باچ کتاب چارا حال فرهوبوځن هق ډولو، توهن دغن ماء نسي تو، فيکيران دي سروف ډوق تودوځ لاکي دغن کائين کلوبوځ، سروف هق نبي موسی تو. کائين کلوبوځ تو تاء ليه بوک، ملينکن توان دي ډوق سهاتي سپاوا دغن المسيح.
- 15 لاني فون، بيلا دي باچ تورات نبي موسی، فيکيران دي تودوځ لاکي. تافي اورغ مان هق فالينغ فرچاي کا ربي، کائين کلوبوځ دي بوک ده.
- 17 فرکتان ربي ساءني تو، کيت بوليه فهم کات، روح ربي عيسى، فس دمان ۲ روح تو اد، دسيتوله اورغ بوليه لفس، تاء جاني همب ده.
- 18 کيت لاني، اد بکس تندا هق کلميان ربي عيسى، ډوق سوار دغن تاء فاکي کلوبوځ تودوځ موک ده. فس، کلميان تو اصل ماري دربي، دي هق تولا دغن روح. کلميان تو جوگ، بري کيت کهور ۲ براوبه جادي سروف دي، دغن کهور ۲ تمبه کلميان کا کيت.

کيت اد بکس سوار کلميان ربي عيسى

باب 4

- 1 توهن، دغن کسياغ بلس هق دي، بري کا اکو نق بوات
- 2 کرج ني. سابيت تو، هاتي کو تاء براس لمه. اکو تاء فاکي

فرکارا هق کنا سوسوف، اتوا هق بري جاني مالو. اکو تاءتوروت جالن منيفو اتوا اوبه فرکتان توهن، نق! اکو رویت هق سبنز دغن بوک لغکه، کران اکو دوق بوات سموا فرکارا دافن توهن، فس هق اکو بوات تو، سموا اورغ کنا ستوجو کات مولیق.

- 3 کالو خبر باءیک هق اکو ميمفي تو دوق تودوغ، معنان دوق
4 تودوغ کا اورغ هق نق فونه دنراک. فواق تو، تاءفرچاي،
سبب فيکيران دي کاتوف هابيس ده دغن تیغوراي هييليس،
دي هق جادي کتوا جاهت دالم دنيا. هييليس دوق تيبیغ
فواق تو، تاءسير بري نمفق چهيا هق سولوه کا دي، ياءیت
چهيا هق اصل ماري دخبر باءیک چارا حال المسيح دغن
کملیان دي. کران دیاله هق بري نمفق روف دي سروف توهن.
5 فس اکو فون باوا ماري خبر ني، بوکن اکو نق بري تیمبول
نام کو سنديري. هق بري تیمبول، ياءیت عیسی المسيح هق
سوغ کنا حرمة جاني رتي، فس اکو نیله هق کرج کنا فادول
کا فواق مو، دغن کران عیسی تو.
6 توهن هق رویت دولوکات:

بري جاديله چهيا سولوه دالم گلف!

توهن توله هق بري چهيا دي سولوه دالم هاتي کیت، نق
بري کیت اد بکس سوار هق کملیان توهن، هق دوق برچهيا
دروف عیسی المسيح.

کملیان توهن دوق دالم بکس هق تمار

- 7 تافي فواق اکو هق باوا فرکارا مهل هق توهن بري
ني، جادي سروف بکس تمار، هق بوات دغن تانه ليات،
نق تنجوق کات کواس هق تیغکي دوق دتوهن، بوکن دکیت.

- 8 بايق کالي فواق اکو سيقسا ده ، تافي سيقسا تو تاء تينديه بري هنجور . کاڊغ ۲ ، فواق اکو تاء اره نق کي ، تافي تاء فوتوس هراخن .
- 9 هق لاون دغن فواق اکو ار بايق ، تافي ار سعمورهق دوق باليق کو جوگ . ولوار بايق فرکارا هق کنا کا فواق اکو بري ربه فون ، تافي تاء فونه جوگ .
- 10 دوق دمان ۲ فون ، فواق اکو بري پات سعمور دالم توبوه ، کسيقسائن سمفي ماتي هق عيسي ، انتوق نق بري پات جوگ دالم توبوه کو ، کات عيسي دوق هيديوف لاني ، فس کيت دوق سپاوا دغن ري .
- 11 فواق اکو دوق هادف بهيا توجو کا ماتي سعمور ، کران عيسي ، نق ار فلواغ بري پات هيديوف ري دالم توبوه فواق کو ، هق نق کنا هنجور ني .
- 12 بالس توله ، سموا هق توجو کا ماتي دوق کرج دالم توبوه فواق اکو ، انتوق نق بري فواق مو بوليه هيديوف کو عيسي .
- 13 ار ايات دالم کتاب هق کات :

سبب اکو فرچاي ، سابيت تو اکو کنا رويت .

- فواق اکو فون فرچاي دغن قواة ايمان سروف تو جوگ ، سابيت تو کنا رويت .
- 14 اکو تاهو ده کات توهن هق بري ربّي عيسي بغکيت هيديوف کليق تو ، ري نق بري اکو هيديوف کليق جوگ . فس دغن کران فواق اکو دوق سهاتي سپاوا دغن عيسي ، ري نق باوا اکو سکالي دغن فواق مو سموا ، ماري مشهادف توهن .
- 15 سموا هق کنا کا فواق اکو ني نق بري فواق مو بوليه جاس . فس ، کهور بايق اورغ نق تريما رحمة توهن ، کهور بايق جوگ ، اورغ هق بوليه اوچف شکور کا توهن بري ري بوليه فوجين .

هاتي نق کهور۲ قواۃ، ولو توبوه لمه فون

- 16 سابيت نیله، هاتي فواق اكو تاء براس لمه. ولو توبوه لوار کهور۲ فونه فون، تافي ردالم کهور بارو هاري ۰۲.
- 17 فس کسوساهن هق کنا کا فواق اكو لاني ريغن ساج، سمنتارا ساج، بري فواق اكو سيف نق بوليه تريما کملیاء بسر، هق کگل، نق بنديغ تاء ليه دغن کسوساهن تو.
- 18 کران کيت فنتيغ توجو، بوکن کا فرکارا ۲ هق مات بوليه نمفق، تافي کا فرکارا ۲ هق تاء ليه نمفق لاگي. هق بوليه نمفق تو، تاهن سبتر ساج، تافي هق تاء ليه نمفق، تاهن سلام ۲۰.

باب 5

- 1 کران توبوه کو دنيا لاني، سروف دغن بغسل دوق سبتر ساج، فس هنجور کي. تافي اكو تاهو کات، اكو نق بوليه رومه بشرگ، هق توهن بوات سنديري، هق تاهن سلام ۰۲.
- 2 دسيني، لاني، اكو مغلوه دوق نق ۲ کا رومه بشرگ تو، سروف دغن اورغ تلنجغ دوق نق کا فکايين.
- 3 تکه اكو دوق دنيا دغن توبوه هق سروف بغسل تو، اكو دوق مغلوه، دغن کران تغکوغن برت. بوکن کات اكو دوق نق چابوت فکايين توبوه کو دغن ماتي، دق! تافي لبیه ۲ لاگي، اكو نق بوبوه فکايين بارو، نق بري سموا هق سمنتارا دسيني بوليه تغکلم، دهق بارو، هق بوليه هيديوف سلام ۰۲.
- 5 جادي توهنله هق چادغ کا کيت، بري نق براوبه بالاس ني. فس، توهن بري روح دي کا کيت، تندا جامين سموا هق دي نق بري کا کيت کو۲ دافن.
- 6 سابيت نیله هاتي کو دوق قواۃ سعمور. اكو تاهو ده کات، لام مان اكو دوق دغن توبوه کو ني، سلام تو جوگ، اكو دوق جاءوه دغن رومه ربي.

- 7 کران اڪو دوق هيڊوف لاني، دغن فرچاي کات اڪو نق بوليه
فرکارا ۲ هق تاءِ نمفق لاکي، بوکن اڪو توجو کا فرکارا هق نمفق
8 ده. هاتي کو دوق قواة سعمور، فس اڪو براس موليق لاکي
تيغگل توبوه کوني، کي دوق سام ربي.
9 تافي هق مستحق سڪالي، اڪو نق بري ربي برکن کا اڪو، تکه
دوق دغن توبوه کو دسيني، اتوا فون دوق دشرگ نون.
10 کران تدتوله، ماءِ نسي کيت سما کنا مڻهادف المسيح، تکه
بي جاني حاكيم، نق کنا بالسن ماسيغ ۲ بائڪ اتواجاهت،
ايڪوت هق کيت بوات، تکه دوق دالم دنيا ني.

کيت برهوبوغ جاني بائڪ دغن توهن کوءِ المسيح ساج

- 11 سوغ فاتوتله کيت تاڪوت دغن مڻهادف ربي تو. سابيت
تو، اڪو فوجوق اورغ، نق بري بي فالیغ ماري فرچاي. هاتي کو،
توهن تاهو بلاک. فس اڪو هارف کات، فواق مو بوليه تاهو
جوگ، سيسي هاتي کو.
12 بوکن اڪو نق اغکيت ديري سڪالي لاکي دافن فواق مو، دق !
اڪو نق بري مو اد سبب بوليه بسر هاتي چارا حال اڪو، نق
بري مو بوليه جواب کا اورغ ۲ هق سغک کات، هق مستحق
فريغکت اورغ، بوکن فراغي بي.
13 کالو اورغ سغک کات اڪو سروف اورغ گيلا، کيچيق بايق حال
ني، سسوغگوهن دق. اڪو کيچيق بالس تو انتوق کرج توهن.
کالو نمفق کات، اڪو سمفرن اقل فون، اڪو کيچيق بالس تو،
انتوق تولوغ فواق مو، بوکن انتوق اڪو سنديري.
14 اڪو ترفقسا کنا بوات بالس ني. سبب المسيح تنجوق کاسيه
بي کا اڪو، بري اڪو کابر کات، المسيح کنا حکوم ماتي گنتي
ماءِ نسي سما. مڻناش، سما تو امييق سگيان دالم کماتين بي
15 تو. اورغ هق بوليه هيڊوف دغن کران المسيح ماتي تو،

- المسيح تاء سير بري بي هيدوف انتوق ديرى سنديري، تافي انتوق
 16 المسيح هق ماتي هيدوف كليق سمولا 'گنتي ري. سابيت توله،
 اكو تاء اوکور فريگت اورغ ايکوت فيکيران ماء نسي. المسيح فون
 اكو بياس اوکور سروف تو جوگ، تافي لاني، دق.
 17 کران اورغ مان ۲ هق ماسوق دوق سمهاتي سپاوا دغن المسيح،
 توهن بري جادي بارو اورغ تو. سموا هق لام تو، سلم ده،
 18 تيمبول هق بارو. فس توهنله هق بوات سموا ني. بي بري کا
 کيت جالن بوليه برهوبوغ جادي باءيك دغن ري، کوء المسيح.
 فس توهن بري کا کيت کرج ميمفي خبر کا اورغ لائن فول کات
 جالن ار ده، نق بوليه برهوبوغ جادي باءيك دغن توهن،
 19 ياءيت توهن، کوء المسيح، بري کا ماء نسي سموا، بوليه
 برهوبوغ جادي باءيك دغن ري سمولا. اورغ هق كليق جادي
 باءيك تو، توهن تاء بري تغکوغ سنديري، دوسا ري. فس،
 توهن سره کا کيت له، کرج ميمفي خبر تو، کات ماء نسي بوليه
 برهوبوغ جادي باءيك دغن توهن سمولا.

توهن دوق فغکيل مو دغن سوارا فولوس

- دالم کرج ني، اكو باوا تيته المسيح، سروف توهن
 20 سنديري دوق فغکيل مو دغن سوارا اكو. اتس نام المسيح،
 اكو مينتاء مو جوگ ۲، کليقله برهوبوغ جادي باءيك دغن توهن!
 21 المسيح تاء ار دوسا سيکيت هابوق، تافي توهن بري المسيح
 قربان ديرى تغکوغ دوسا ۲ کيت، انتوق نق بري کيت هق دوق
 سمهاتي سپاوا دغن ري، تاء ساله ده دغنداغن توهن، دغن
 سابيت المسيح ماتي تو.

باب 6

- 1 کران فواق اكو کرج سکالي دغن توهن، اكو مينتاء دغن مو
 سوغکوه ۲، جاغن مو تاهوق فري ۲ ساج، رحمة توهن هق مو

ترېما ده تو، بوات تاء ترفاکي. دالم کتاب توهن کات:

ار ماس هق اکو فيليه، هق اکو دغر مو ده.

ار فرياغ انتوق سلامت، هق اکو ماري تولوغ مو ده!

2

فس، اکو فولوس رویت کا فواق مو کات، لاني سمفي ده ماس هق توهن فيليه تو، سمفي ده فرياغ هق توهن نق بري سلامت.

تندا کات فولوس کرج کا توهن مولیق

اکو تاء سیر بري چله کا اورغ بولیه کات کرج کو کا توهن

3

ني، ساله. سابیت تو، اکو کاچغ تاء سیر بري چمفيغ، کا

سیاف ۲ فون. نق! سسوغکوهن، دالم سموا هق اکو بوات،

4

اکو بري تندا کات، اکو کرج کا توهن مولیق، دغن تنجوق

کات اکو بولیه صبر سوغکوه، دالم کسوساهن، دالم کسوقسائ،

دالم اف ۲ هق هیمفیت.

اکو بیاس ترېما فیات، کما کوروغ، دوق دالم هارو هارا، اکو

5

بیاس کرج برت، اود تیدور، اود ماکن.

فس اکو بري تندا جوگ، کات دغن اخلاص هاتي کرج کا توهن،

6

دغن تنجوق علمو هق توهن بري کا اکو، دغن بري نمفک کات

هاتي صبر، دغن بوات موره هاتي کا اورغ، دغن بري پات روح

توهن دوق دالم هاتي کو، دغن تنجوق کاسیه سوغکوه کا ادیق

برادیق.

دغن بري مېمفي خبر هق بنر، دغن بري پات کواس توهن، دغن

7

امبیق فاکی سنجات هق توهن بري کا اورغ هق هاتي بتول،

نق تیکم اتوا نق تفس فون. دغن سموا ني، اکو بري جاري

تندا کات اکو کرج کا توهن هق مولیق.

اکو دوق سیف ده، نق ترېما بلاک، حرمة اتوا هینا، کا اکو

8

اورغ کات ساله، اتوا فوجي. ولو اکو کیچیق هق بتول فون،

تافي اورغ فتنه کات بوهوڻ.

- 9 سموا اورغ کڻل اکو، تافي اورغ بوات کا اکو سروف تاء کڻل جوگ. اورغ بويي کات ماتي، تافي تيغوقله اکو دوق هيڊوف لاکي. اورغ کات اکو کنا حکوم بونوه ده، تافي تاء سمفي ماس لاکي. اورغ سڻک کات تاء اد سيکيت هابوق هق بوليه بري اکو
- 10 سنغ هاتي، تافي سسوغکوهڻ، اکو بوليه سوک هاتي، فوجي کا توهن سعمور. اورغ تيغوق کات مسکين، تافي اکو بري بايق اورغ کاي. نمفق سروف تاء اد بارغ سکارا فون، تافي سسوغکوهڻ اد سرب بلاک.
- 11 اوه اديق براديق کو دکورينٽوس! هق اکو رويت کفد مو تو، تاء سوسوف اف سکارا. بالس مان فيکيران دالم هاتي کو، بالس تو جوگ اکو بوک کا فواق مو.
- 12 کالو مو براس اد سکاٽن، فرهوبوڻ مو اکو، بوکن باليق کو. هق بري سکت تو دوق باليق فواق مو سنڊيري.
- 13 اکو اجر کا فواق مو سروف اکو اجر انق ۲ کو سنڊيري، بوکاله فراسان مو کا اکو، سروف اکو بوک کا فواق مو، دولو تو.

جاغن ماسوق چمفور هق چره دغن هق گلف

- 14 جاغلنه ماسوق جادي سکمفوه دغن اورغ هق تاء سير فرچاي کا المسيح. تنتو تاء ليه جاي! کران بالس مان بوليه برکوڻسي هق بتول دغن هق تاء بتول، اتوا بوليه چمفور گاء ول هق چره دغن هق گلف؟ تنتو تاء ليه!
- 15 بوليپکه المسيح ستوجو دغن هيپليس؟ اتوا بالس مان، اورغ هق فرچاي دغن اورغ هق تاء فرچاي، بوليه توکر بارغ کي ماري؟
- 16 تنتو تاء ليه. بوليپکه، فاکي رومه سبواه سمبه کا توهن کاتيقي سمبه کا برهالا کاتيقي؟ تنتو تاء ليه. فس سروف تو جوگ، توبوه کيت جادي تمفت دودوق توهن يڻ هيڊوف تو.

ایکوت توهن سنڊيري رویت رالم کتاب کات:

اکو نق تورون روق سکالي دغن اورغ ۲ هق جادي ميليق کو،
نق بري دي جادي تمفت اکو دودوق سعمور.
اکو نق جادي ربي دي، دي فون نق جادي ميليق کو!

17 فس توهن کات لاکي:

سابيت تو، مو کنا تيغل فواق تو، کي روق سوکو دغن
دي، جاغلله کي برهوبوغ لاکي دغن هق چمر.
اکو نق سموت مو، توهن کات. اکو نق جادي باف مو،
فس مو فول، نق جادي انق ۲ کو جنتن بتينا فون.
بالس توله کات توهن یغ مهاکواس.

18

باب 7

1 هي اديق براديق کو! فرجنجين سائي تو، توهن بري ده کا
کيت. سابيت تو، بائیک بري ڊيري کيت چوچي درفد سموا هق
بوليه بري چمر، توبوه بدان اتوا هاتي فون. فس دغن روق
تاکوت کا توهن سعمور، توجو نق هيڊوف سوچي انتوق
توهن دغن سمفرن، ایکوت هق توهن برکن.

فولوس بوليه خبر هق بري هيلغ سوسه

2 هي اديق براديق! يوکاله هاتي مو کا اکو بري لواس! اکو
تاءوات ساله کا اورغ سيکيت هابوق. اکو تاءبياس فيمفين
اورغ بري فونه، اتوا تيفو ڊاي فون.

3 هق اکو کات ني، بوکن نق حکوم مو کات ساله، دق! اکو

بياس رویت ده، کات اکو کاسيه کا فواق مو سعمور، هيڊوف

4 سمفي ماتي فون. اکو بوليه هارف کا فواق مو. اکو براس بسر

هاتي حال فواق مو. سوغکوه فون اکو روق رالم کسوساهن بايق،

تافي هاتي کو دوق قواة، دوق مليمفه توبيت دغن سوک هاتي
سممور.

5 فس، رويت لاکي حال اکو کي سمفي کا نکري ماکدونيا تو. ولو
سمفي ده فون، سوسه تاء هيلغ لاکي. کيري، کانن، بلاکغ، دافن
فون، ار چمفيغ سمات. ار هق فهم کوء لائين، ساله ارتي.
هاتي کو فون براس برکوچه.

6 تافي تريما کاسيهله کا توهن، بي هق بري سماغت کا اورغ
هق لمه. کران توهن بري سماغت کا اکو جوگ، بولييه تمو
دغن تيتوس دسيتو.

7 فس، اکو قواة سماغت، بوکن سابيت تمو دغن بي ساج، دق.
تافي دغن سابيت فواق مو دکورينتوس بري هاتي بي قواة
سماغت دولو. بي رويت کا اکو فريحال فواق مو دوق براس نق
تمو دغن اکو سمولا، حال فواق مو سسل، فس حال مو براس
نق فيرا نام کو لاني. بيلا اکو دغر ده تو، اکو براس کهور
سوک هاتي لاکي.

ار سوسه هاتي هق توهن برکنن

8 ولو سورت کو دولو تو بري هاتي فواق مو سوسه، اکو
تاء سسل دغن سورت اکو هنتر تو. دولو، اکو براس شک
هاتي سيکيت، کران سورت کو تو کنا بري مو سوسه سبنتر.
9 تافي لاني، اکو براس سوک هاتي ده، بوکن دغن سابيت مو
سوسه، تافي دغن سابيت سوسه هاتي مو تو بري براوبه
کلاکوان مو. سوسه هاتي بالس تو هق توهن برکنن، فس
هق اکو بوات کا فواق مو تو، تاء روکي.

10 کران سوسه هاتي هق توهن برکنن تو، بري توبه، توکر
فيکيران، بولييه باواء سمفي سلامت. دالم حال تو، تاء ار ده
هق واويه بري سسل کوء دافن. تافي سوسه هاتي تمار،

سروف هق ماءنسي توجو کوء دنيا تو، هق تو باواء سمفي ماتي ساج.

11 تيغوقله، بالس مان سوسه هاتي هق توهن برکنن تو، بري هاتي مو گادوه، کهور ۲ براس نق مڱاکو کسلاهن، بري سلسي، فس بري مو براس بنچي کا کسلاهن تو، بري مو تاکوت. سوسه هاتي مو تو، بري مو براس کليسه نق تمو دغن اکو سمولا، براس نق فيرانام کو، براس نق حکوم بري موليق، اتس کسلاهن تو. دالم سموا فرکارا ني، فواق مو تنجوق کات مو تاء ساله ده لاني.

12 سورت هق اکو توليس ده دولو تو، بوکن انتوق اورغ هق بوات ساله، اتوا انتوق اورغ هق کنا ساله تو، دق. تافي انتوق بري هاتي فواق مو کابر دافن توهن، کات قواة ستارا مان مو کاسيه کا اکو.

13 سبب نيله، هاتي کو قواة سماغت، فس لبيه لاگي، اکو براس سوک هاتي تيغوق تيتوس هق دوق سوک هاتي جوگ، کران فواق مو سموا بري هيلغ روسيغ دي.

14 دولو، اکو اڱکيت نام فواق مو کا تيتوس، فس تريما کاسيهله دغن فواق مو تاء بري اکو مالو. دق! سموا هق اکو بياس رويت ده کا فواق مو بنر بلاک. فس هق اکو اڱکيت نام فواق مو کا تيتوس فون، مو بري تندا کات بنر جوگ.

15 سبب نيله، تيتوس براس کهور ۲ نق کاسيه کا فواق مو، تکه بي ايغت بالس مان فواق مو سموا جوغ طاعة کا دي، فس

16 بالس مان فواق مو سمبوت بي دغن کتر کناليج. اکو براس سوک ريا کران اکو بوليه هارف کا فواق مو دغن سمفرن راس.

فواق المسيح کنا سره دويت کا توهن

باب 8

هي ادیق براديق، اکو نق بري مو تاهو، بالس مان اورغ ۲

- 2 دالم فواق ۲ المسيح دنکري ماکدونيا ني بري پات رحمة توهن .
 2 دي کنا اوجي برت دغن بايق کسوساهن ، تافي هاتي دي
 فنوه دغن سوک ریا ، سهیغک ، ولو دي مسکين ساغت فون ،
 3 دي موره هاتي لیمفه توبیت ، نق سره دویت کا توهن .
 3 اکو بولیه ناءیک سقسقي کات ، دي سره بوکن سکت هق دي
 کیرا بولیه بري ساج ، دق . تافي لبيه فد تو لاگي ، دغن سوک
 ریلای سندیری .
- 4 فس دي مینتاء دغن اکو جوگ ۲ بري دي ار فلواغ بولیه تولوغ
 بنتو اورغ ۲ هق جادي میلیق توهن دنکري یهودیه .
- 5 هق ني لبيه فد هق اکو دوق هارف . هق مستحق ، دي
 سره ډیری دي کا ربّي ، فس سبب دي توروک کهنديق توهن
 دي سره ډیری کا اکو جوگ .
- 6 سابیت نیله ، اکو براس نق سوروه تیتوس کي کا تمفت مو فول .
 فس دویت هق دي رویت نق بري فواق مو سره انتوق تنجوق
 کسیاغ بلس تو ، لاني دي نق ماري کوتیف بري هابیس ده .
- 7 مو کاي کیتو لالو دالم سموا فرکارا ، دغن ایمان ، دغن کیچیفن ،
 دغن ارتي سموا هق توهن بري ، دغن کاچغ توروک دي ، فس
 دغن کاسیه کا اکو کاتیق . لاني بري پاتاله ، کات مو کاي دغن
 موره هاتي تنجوق کسیاغ بلس کا اورغ تو جوگ .

نصیحة فولوس چارا حال سره دویت تو

- 8 بوکن اکو سوروه مو ، ترفقسا کنا بوات ، دق ! اکو امیق
 چنتوه اورغ لائین ، هق تنجوق کسیاغ بلس دغن تولوغ کیتو ،
 نق سوني کاسیه فواق مو ، بولیه سمفي ستارا تو کا دق .
- 9 ایغتله کا ربّي کیت ، عیسی المسيح ، ستارا مان دي تنجوق
 رحمة دي کا کیت ډولو . ولو دي کاي سکالي فون ، تافي دي
 توکر جادي مسکين انتوق کیت ، نق بري کیت کاي دغن کران

ڊي مسکين تو.

10 تاهون لالو، جاي فواق موله، هق مولا ۲ براس نق سره
فرهيمفون دويت، فس فواق مو هق مولا ۲ چارځ نق تولوځ
فواق تو جوڳ. ايکوت فيکيران اکو، موليڻ لاني مو بري سلسي
هق مو چارځ ډولو تو.

11 بالس توله، هق مو بري سلسي نق ستوجو دغن هق مو چارځ
ډولو تو، ايکوت هق مو ار.

12 کران کالو هاتي اورځ براس نق سره دغن سوک ريلا، توهن نق
تريما هق ڊي سره تو، ايکوت سکت هق اورځ تو ار، بوکن
ايکوت سکت هق تاءار.

13 بوکن اکو نق بري ريغن اورځ نون، نق بري فواق مو کنا تغکوځ

14 برت، نق. تافي نق بري سام ۲ بوليہ کنا، ياءيت لاني هق مو ار

باپق تو، بوليہ بري چوکوف هق ڊي کورځ. فس کالو هق ڊي

ار باپق فول، ڊي نق بري چوکوف هق مو کورځ. بالس تو،

نق جاي سام ۲ کنا مو اکو. ايکوت ايات دالم کتاب هق

15 کات:

اورځ هق بوليہ باپق تاءار لبيہ،

اورځ هق بوليہ سيکيت، تاءکورځ.

تيتوس دغن ساءين ۲ ڊي

16 تريما کاسيهله کا توهن، سبب ڊي بري تيتوس دوق ايغت ۲

17 کا فواق مو، سروف اکو. بوکن ڊي بوات ايکوت هق اکو سوروه

ساج، دق. تافي ڊي ريلا سنڊيري نق ڳي، کران ڊي دوق

ايغت ۲ کا فواق مو تو.

18 اکو نق هنتر سئورځ اڊيق سکالي دغن تيتوس، هق سما اورځ

فواق المسيح اغکيت نام، دغن کران کرج ڊي ميمفي خبر بائیک

- 19 تو. لبيه ۲ لاڳي، فواق المسيح دسيني فيليه لتق اديق کيت ني، نق بوات تمن فواق اکو، دغن کرج تنجوق کسياغ بلس تو. کرج تو بري اورغ فوجي کا ربي، فس تنجوق کات کيت نق تولوغ منولوغ مو اکو کاتيقي.
- 20 اکو تاء سير بري فلواغ کا اورغ بوليه کات ساله دالم کرج کي کوتيف فرهيمفون دويت هق بايق تو.
- 21 کران توجوان کو، نق بوات هق بنر سمات، بوکن دنداغن ربي ساج، تافي دنداغن ماء نسي کاتيقي.
- 22 سابيت توله، دغن اديق کيت دوا اورغ سائي، اکو نق هنتر سئورغ لاڳي، هق اکو سوي بايق کالي ده، فس اکو بوليه کات، دي راجين دالم بايق فرکارا. فس لاني يي کهور راجين لاڳي، نق کي کا تمفت مو، کران دي فرچاي يقين کات بوليه هارف کا فواق مو.
- 23 کالو ار اورغ هق شک هاتي، نق تان، تيتوس دياه هق کرج سکا لي دغن اکو، جاني سکوشسي هق سجاتي، نق تولوغ فواق مو. فس اديق دي دوا اورغ لاڳي تو، دي باوا تيته فواق المسيح دسيني، توجوان دي نق بري اورغ فوجي کا المسيح، تاء ار توجوان لاین. سابيت تو، سموتله فواق ني دغن کاسيه، بري فواق ۲ المسيح دسموا تمفت بوليه تاهوکات سوغگو، هق اکو فوجي کا فواق مو دولو تو.

باب 9 چنتوه انتوق فرتولوغن مو اکو، اورغ کریستين

- 1 سسوغگوهن، اکو تاء کنا توليس کا فواق مو، چارا حال دويت هق کيت کوتيف فرهيمفون نق کيريم کا اورغ ۲ هق جادي ميليق توهن دنکري يهوديه تو.
- 2 اکوتاهوره کات مو سوک منولوغ، فس اکو فوجي ده فواق مو، دولو، کا اورغ ۲ دماکدونيا، کات کا يي: اديق براديقي دنکري احيا

3 جق تاهون ډولو لاځي، ډي ډوق سيمفن سيف ده نق تولوغ!
فس سابيت مو ار سماغت نق تولوغ بالس تو، بري ډي فون
براس نق تولوغ جوگ. فس لاني اكو نق هنتر فواق اډيق کوني
کي کا تمفت مو، تاء سير بري سيا ۲ هق اكو فوجي مو ډولو،
کات مو ډوق سيمفن سيف ده تو.

4 تاكوت کالو ار اورغ ۲ ماكدونيا ماري سکاالي دغن اكو کا تمفت
مو، فس مو ډوق تاء سيمفن لاځي، تنتو اكو نق براس مالو،
کران ډوق هارف کا فواق مو بالس تو. فس، مو فون نق
براس مالو جوگ.

5 جادي سابيت نيله، اكو سوروه اډيق ۲ کي ډولو فد اكو، بري
ار سيف ده ډويت هق مو جنجي ډولو نق کوتيف تو. دغن
جالن ني، بيلا اكو سمفي کا تمفت مو، نق سيف بلاک ده،
فس نق تنجوق کات مو بري دغن سوک ريلا.

اورغ هق بري دغن سوک ريلا

6 ايغتله اډيق براديق کو، کالو ميسل اورغ هق تانم بنيه
سيکيت، مغم فون بوليه سيکيت، فس اورغ هق تانم بنيه
بايق، مغم فون بوليه بايق جوگ.

7 سابيت تو، بريله ماسيغ ۲ ايکوت هق هاتي سوروه. جاغن بري
دغن کات سايغ، اتوا ترفقسا کنا بري. کران توهن کاسيه کا
اورغ هق ريلا بري دغن سوک هاتي.

8 فس توهن ار کواس بري مو لبیه فد هق مو کنا فاکي، چوکوف
بوليه فاکي انتوق ډيري سنډيري سعمور، فس ار لبیه جوگ انتوق
بوليه تولوغ اورغ لاین بيلا ۲ فون. سروف ار ايات دالم کتاب

هق کات چارا حال اورغ:

ډي بري کا اورغ ۲ مسکين دغن موره هاتي، فس سابيت
هاتي ډي باءیک، ډي نق بوات بالس تو سعمور.

- 10 کا اورغ هق منابور، جادي توهنله هق بري بنيه، فس مڪانن
 کا کيت فون يي بري جوگ. ديال هق نق بري کفد مو بنيه
 چوکوف نق تانم، فس يي نق بري بنيه تو تومبوه هيغڏ سمفي
 بوليه حاصلن بايق، هق مو بري دغن بآيک هاتي دولو تو.
 11 توهن نق بري مو جادي کاي، چوکوف بوليه تولوغ اورغ دغن
 اخلاص. فس بايق اورغ نق تريما کاسيه کا توهن، دغن کران
 دويت هق مو کيريم کا اکو انتوق يي.
 12 کران دغن تولوغ اورغ هق جادي ميليق توهن دنکري يهوديه
 تو، بوکن نق بري چوکوف هق يي کورغ ساج، دق. تافي
 نق بري بايق اورغ دسيتو کهورم قواة فوجي کا توهن جوگ.
 13 دغن تولوغ يي، مو نق بري نمفق بالس مان هاتي مو، بري
 بايق اورغ دسيتو نق فوجي کاتوهن، کران مو مڱاکو دافن اورغ،
 دغن رويت خبريغ بآيک حال المسيح، فس کران مو بهاگي
 دغن موره هاتي کا يي، فس کا اورغ لآين جوگ.
 14 باليق يي فون، جالن يي بردعا تو، تنجوق کات يي برسرا
 کا فواق مو، کران رحمة هق توهن تورون کا فواق مو بايق
 کيتو لالو.
 15 اوه اوچف تريما کاسيه له کا توهن، کران هق يي هديه کا
 کيت هابيسم چيکف موليق تو، نق بنديغ تآليه.

فولوس جواب کا اورغ هق کات يي تآترفاکي

باب 10

- 1 فس چارا حال ديري کو سنديري فول، اد اورغ هق کات، بيلا
 اکو دوق دافن فواق مو، اکو اورغ فناکوت، بيلا دوق جاءوه
 اکو اورغ براني. تافي لاني، ايکوت المسيح هق هاتي لمه
 لمبوت، هق تآ اغکيت ديري تو، اکو فولوس نق فسن جوگم
 2 دغن فواق مو، کات جاشنله فقسا اکو، بري کنا تنجوق کات
 براني، تکه اکو مشهادف فواق مو سمولا فول. تنتوله اکو

- براني کيچيڻ دڻن اورځ ۲ هق کات اڪو توروت فيکيران مائسي .
 3 سوځکوه فون لاني اڪو فاکي توبوه مائسي لاکي، تافي اڪو تاء
 فاکي فيکيران مائسي، نق بوات برلاون، دق !
 4 فرکاکس ۲ هق کيت فاکي نق بوات برلاون تو، بوکن هق اورځ
 دنيا، تافي هق توهن بري کا کيت، هق اد کواس بري فونه
 فنفيس ۲ مائسي اتوا هق هييليس فون .
 5 کيت نق هافوس فيکيران مان ۲ هق فلسو، اف ۲ هق مپومبوځ،
 تاء سير کنل توهن . فس کيت نق کي هيلق سموا فيکيران ماري
 6 بري طاعة کا المسيح . سوده فواق مو بري تنداکات مو طاعة
 موليق، بارو اڪو دوق سيف ده نق حکوم اتس اورځ مان هق
 تاء سير طاعة لاکي .
 7 تيڻوقله کا فرکارا هق دوق دافن مات ! کالو اد اورځ دالم فواق
 مو کات ري جاني ميليق المسيح، بري اورځ تو کابر کات، اڪو
 فون جادي ميليق المسيح سروف ري جوگ .
 8 بغکالي اڪو کيچيڻ بايق سيکيت، چارا حال کواس هق ربّي
 بري کا اڪو، تافي ري بري کواس تو کا اڪو انتوق بري هاتي
 مو کوکوه، بوکن بري رونتوه . سابيت تو اڪو تاء براس مالو .
 9 تافي مقصود کو، بوکن نق بري مو تاکوت دڻن سورت ۲ هق
 اڪو کيريم تو . اد اورځ کات: سورت فولوس هنتر کا کيت ني،
 10 قواة، بري کيت تاکوت، تافي بيلا ري ماري سنديري، کيت
 براس تاور، سروف تاء اد فائده مان، فرکتان ري !
 11 اڪو نق جواب کا اورځ تو: مو کنا کابر کات، بالس مان اڪو
 توليس دالم سورت تکه اڪو دوق جاءوه ني، بالس تو جوگ اڪو
 نق بوات، بيلا اڪو ماري کا تمفت مو!

فولوس جواب کا اورځ هق کات ري اڱکيت ڊيري

- 12 اڪو تاء فندي نق بنديڻ ڊيري کو، کات اڪو دوق سام

13 تیڻگي دغن فواق تو هق اغکیت ډيري، دق! ډي اوکور تیڻوق
ډيري سیاف تیڻگي دالم فواق ډي ساج. هق تو بودوه سوځکوه!
تافي اكو لاین. اكو تاء سیر کیچیق بري لځکه باتس. اكونق
ستارا هق توهن بري اكو تځوځ ساج. فس، تځوځن کو ني
ترماسوق فواق مو جوځ.

14 سبب تو، بیلا اكوگي رويت خبریځ بائیک کا فواق مو ډولو ۲ تو،

15 بوکن اكو لځکه باتس، دق. فس اكو تاء کنا کیچیق حال

کریجان لوار فد تځوځن هق توهن سکت انتوق اكو. تافي

اكو هارف کات، ایمان فواق مو نق برتمیه کهور بایق، بري

اكو بولیه بوات کرج بسر لاځي، تافي سکت هق توهن بري

تځوځ ساج.

16 فس کالو کهندق توهن، بارو اكو بولیه میمفي خبر بائیک

ډنکري ۲ بالیق سان نکري مو. دسیتو، تاء کنا اغکیت ډيري

بولیه ماسوق چمفور دغن کرج اورځ لاین.

17 تافي ایکوت ایات دالم کتاب:

سیاف ۲ نق کیچیق بسر، مولیقله ډي کیچیق

حال اف هق توهن بوات.

18 کران اورځ هق بولیه جامین کات مولیق، یاءیت ډي هق توهن

برکن، بوکن هق اغکیت ډيري ډي کات مولیق.

باب 11 فواق ۲ فلسو هق کات ډي باوا تیتہ المسیح

1 هي ادیق برادیق کو! صبرله سیکیټ دغن اكو، ولو مو

کات اكو بودوه فون، ننټي دغر سبنټر!

2 اكو براس بیمیځ چارا حال فواق مو، سروف توهن سنډيري

ده. کالو بنډیځ، فواق مو سروف دغن انق ډارا، اكو ني جاري

چي. سروف کات اكو جنجي ده نق بري فواق مو منیکاح دغن

ساتو اورغ ساج ، ياءيت المسيح .

3 تافي اكو تاكوت فيکيران فواق مو نق كنا تيفو ، سروف سיתי

حوا كنا تيفو راولر تو ، بري مو تيغگل دوق کاسيه طاعة کا

المسيح دغن اخلاص هاتي فاليغ توروو هق چمر بناس .

4 سبب اكو فرهاتي کات ، بيلا اورغ ماري نق اجر مو ، عيسى هق

دي رويت تو ، لائن فد عيسى هق اكو رويت ، روح هق دي ،

لائن فد روح توهن هق مو تريما ده ، فس خبر دي فون لائن

جوگ . ولو بالس تو فون ، مو کات بوليه سمبوت دي دغن ريلا ،

تاف . ايکوت فيکيران اكو ، اكو تاء رنده سيکيت فون فد فواق

تو هق کات دي باوا تيته المسيح جاي فريغکت تيغکي فد

اورغ لائن .

6 بگکالي اكو کورغ سيکيت فد دي دغن فندي کيچيق ، تافي دالم

فرکارا هق توهن بري اكو اجر تو ، بق سکالي !

کنف ۲ کالي اكو کي کا تمفت اورغ ، اكو رويت بري پات ده فرکارا ۲

تو ، دغن تيف ۲ ماچم .

7 بيلا اكو ميمفي خبر بائيك کا فواق مو دغن تاء امبيق اوفه تو ،

ساله که ، اكو مرنده ديري انتوق :ق اغکيت فواق مو ؟

8 تکه اكو دوق کرج رتمفت مو ، دکورينتوس ، اكو تومغغ دغن

فواق المسيح رتمفت لائن ، سروف اكو امبيق رويت دي

انتوق نق فادول کا فواق مو .

9 تکه تو ، بيلا رويت تاء چوکوف نق فاکي ، فواق مو تاء کنا سوسه

سابيت اكو . کران اديق براديق هق ماري رنگري ماکدونيا باوا

ماري اف ۲ نق تولوغ اكو . ماس هق لفس ده تو ، اتوا کو دافن

فون ، اكو جنجي تاء بري مو کنا سوسوه ده .

10 اكو برسومفه اتس نام المسيح ، هق تاء ليه بوهوڭ ، فس هق

دوق اد دالم ديري کو ، کات دالم سموا نکري اخيا مو تو ، اكو

تاء بري فلواغ سيکيت هابوق بوليه کات ، اكو براوبه کيچيفن اكو

- 11 دولو تو. سبب اف اكو کيچيقي بالسنی؟ اكو تاء کاسیه کا فواق موکه؟ دق! توهن تاهو کات اكو کاسیه سوغکوه.
- 12 هق اكو بوات لانی دغن تاء کنا اوفه تو، اكو نق هوغو بوات کي لاکي، سبب تاء سیر بری فلواغ کا فواق فلسو هق کات دي باوا تيته المسيح تو، بولیه اغکیت دیری کات دي کرج کا توهن سجالن دغن اكو
- 13 فواق تو بوکن هق سبئر، دي جادي هق فلسو. کرج دي تاء بتول، فس دي سالین بوات لولق کات دي جادي فواق هق باوا تيته المسيح.
- 14 هق تو تاء فلیق، سبب هیلیس سندیری بولیه سالین روف جادي سرور ملایکه هق باوا بکس چهیا توهن.
- 15 سابیت توله، تاء فلیق جوگ، همب ۲ هیلیس بولیه سالین روف، سرور اورغ هق کرج سبئر کا توهن. سود سکالي دي نق بولیه هق سوغ دغن هق دي بوات.

فولوس کنا سوسه تکه دي باوا تيته المسيح

- 16 اكو نق رویت سکالي لاکي، جاغن سیاف سفک کات اكو بودوه، کيچيقي تاء ترفاکي. تافي ولو مو کات اكو بودوه فون، سمبوتله اكو سرور تو، بری فلواغ کا اكو بولیه اغکیت دیری سیکیټ. سسوغکوهن، اغکیت دیری بالسنی تاء کنا مغنا دغن اورغ هق توروت فرینته رټي، تافي توروت چنتوه اورغ بودوه. ولو بالسنی تو فون، اكو ار سبب بولیه اغکیت دیری جوگ.
- 17 ار بایق اورغ هق اغکیت دیری دغن کران کفنداين دیری دالم دنیا. اكو فون نق اغکیت دیری بالسنی تو کاتیق!
- 19 فواق مو بیجق فندي بلاک، بوکن؟ سابیت تو، مو بولیه صبر دغن اكو، هق کيچيقي سرور اورغ بودوه!
- 20 ها سوغکوه، مو صبر ده، دوق لق کا اورغ هق ماري بری مو

- جاري همب ۲ ري، فرهايس بارغ ۲ مو، تيفو راي مو، اغکيت
 ڊيري اتوا بوات هينا هيڱگ سمفي تمفر موک فون، مو تاء کابر!
 21 اڪو تاء ليه بوات سروف فواق تو، فس کنا مالوکه، کات اڪو تاء
 بوات سروف ڀي؟ ڊق! کالو ار اورغ هق براني کات، ڀي ار
 سبب بوليه اغکيت ڊيري، اڪو فون براني جوگ. تافي کيچيق
 اڪو ني سروف اورغ بودوهله!
- 22 فواق تو اغکيت ڊيري کات ڀي اورغ بغسا عبراني که؟ اڪو فون
 بغسا تو جوگ! فواق تو اورغ اسرائيل که؟ اڪو فون اورغ اسرائيل
 جوگ! ڀي جاري سئورغ کتورونن نبي ابراهيم که؟ اڪو فون
 سروف تو جوگ!
- 23 فواق تو کرج کا المسيح که؟ اڪوله کرج راجين لبيه فد فواق
 تو سموا! (بگکالي کيچيق اڪو ني سروف اورغ کيلا؟) اڪو کرج
 تروق لبيه فد ڀي. اڪو کنا کوروغ اچف لاکي فد ڀي. اڪو کنا
 کاتق بايق کالي تاء هابيس نق بيلغ، فس دکت نق ماتي فون
 24 بايق کالي جوگ ده. حکوم فيات هق تيگ فولوه سميلن کالي
 تو، اڪو کنا ليم کالي ده داورغ يهوي.
- 25 اڪو کنا حکوم روتن داورغ روم تيگ کالي ده. اڪو کنا فيگوغ
 دغن باتو، دکت نق ماتي، سکالي. تيگ کالي سوسه سلم کفل
 دالم لاءوت. سنهاري سمالم اڪو دوق هاپوت اتس فافن سکفيغ
 دالم لاءوت تو.
- 26 تنغه اڪو برجالن، اچف کالي ده، اڪو مفهادف بهيا دغن
 کنا اير بسر، دغن کنا سامون. اڪو مفهادف بهيا داورغ
 بغسا کو سنڊيري، اتوا داورغ بغسا لائين جوگ، جاني کالوت
 کيپوت دالم بندر، فس دلوار بندر اتوا تنغه لاءوت فون، اڪو
 مفهادف بهيا جوگ. فس دغن اورغ هق بوات لولق کات ڀي
 جاني اڍيق براديق، اڪو کنا بهيا گاتيقي.
- 27 اڪو بياس اوسها کرج برت، دغن سوسه فايه، دغن تاءان نق

تیدور، براس لافر، براس دهاگ، تاءار نق ماکن، تاءار تمفت
فرلیندوڻ اتوا فکاین فون .

28 باپق لاڳي هق جاني کا اکو، سکت ني فون چوکوف ده . تافي
هق برت لاڳي، دهاتي کو، کنف ۲ هاري، اکو دوق ايغت کا
فواق ۲ المسيح دسموا تمفت، کات ماجو کا دق؟

29 اراکه اورځ هق جادي لمه؟ اکو فون توروټ لمه جوڳ . اراکه
اورځ هق کنا تيفو، جاتوه دالم دوسا؟ اکو فون براس سديه
سابيت اورځ هق تيفو تو .

30 کالو باس اکو اغکيت ډيري، موليق اکو کيچيق بسر اتس
فرکارا ۲ هق تنجوق کات اکو لمه !

31 توهن هق جادي باف ربي عيسي، تاهو ده کات اکو تاءبوهوځ!
سوځ فاتوتله کيت فوجي کا دي سعمور ۲ !

32 ها! اکو بارو ترايغت، بيلا اکو دوق ډبندر دمشيک، اورځ هق
وکیل راج اريټس ډبندر تو، سوروه فواق عسکر جاڳ فينتو ۲

33 کوت، نق ايگت اکو. تافي اکو کنا هولور تورون دالم کيځ،
کوۂ فينتو ناتځ کوت، فس سلامت ده .

فرکارا ۲ فليق هق ربي بري فولوس نمفق

باب 12

1 سوځکوه فون تاءار فائده اغکيت ډيري، تافي اکو نق رويت

هوبوځ کي لاڳي، چارا حال فرکارا ۲ هق ربي بري اکو نمفق،
2 بري اکو اړتي . اکو کنل دغن اورځ جنتن ساتو اورځ، هق جاني

سئورځ ميليق ربي عيسي . امفت بلس تاهون ماري ده، بي کنا
اغکيت بري تيغوق، تمفت تيغکي سکالي دشرگ . اکو تاءتاهو

کات، بي نائيک دغن توبوه، اتوا دغن روح ساج . توهنله هق
3-4 تاهو . فس اکو تاهوده، کات اورځ ني کنا اغکيت کا تمفت نام

فرداوس دشرگ تو، فس دي دغر فرکارا ۲ هق تاءليه سبوت،
هق تاءسوځ مائسي کنا سبوت . اکو تاءتاهو کات بي نائيک

- دغن توبوه، اتوا دغن روح ساج. توهنله هق تاهو! 5
 دغن سابيت اورغ نيله، اكو بوليه كيچيقي بسر. تافي اكو
 تاء سير اغكيت ديري كو سنديري، ملينكن فرکارا هق تنجوق
 کات اكو لمه. کالو اكو كيچيقي بسر سکالي فون، تاء 6
 سياف بوليه کات تاء اديسي، سبب اكو بري پات هق
 سبئر. تافي اكو تاء سير اغكيت ديري بالس تو. تاکوت اورغ
 نق حرمة کا اكو، کران فرکارا تو لبیه فد هق دي سنديري
 بياس دغر بياس تيغوق، هق اكو بوات.

رټي کات رحمة هق دي بري کا اكو با فادن ده

- تافي توهن تاء سير بري اكو فاءوغ ديري، دغن کران فرکارا 7
 فليق هق دي بري اكو تيغوق. سابيت تو، اكو کنا تريما هق
 سروف دوري، هق دوق چوچوق دايسي، فسوروه هييليس،
 هق لارغ اكو تاء بري فاءوغ ديري.
 تيگ کالي ده، اكو مينتاء جوگ دعا دغن رټي، بري لفس 8
 فرکارا تو.
 تافي رټي جواب کات: 9
 رحمة هق اكو چوچور اتس مو، با فادن انتوق مو.
 کران کواس کو بوليه نمغق دغن سمفرن داورغ هق لمه!
 دغن سابيت ني، اكو فولوس براس سوک، نق امبيق سماو هق
 بري اكو لمه تو، بوات فاكي اغکيت ديري، اصل کواس المسيح
 دوق اتس کو.
 اكو تاء سير کات تاء امبوه اف 2 هق بري اكو لمه، اتوا هق کنا 10
 هينا، اتوا هق کنا سوسه، اتوا هق کنا سيقسا، اتوا چمفيغ
 مان 2 فون، هق کنا کا اكو دغن کران المسيح. سبب تکه دوق
 لمه تو، تکه تو اكو تريما کواس.

فولوس دوق بيمبڻ ڪا اورڱ دڪورينتوس

- 11 دغن اڱڪيت ڊيري بالسني، اڪو بوات سروف اورڱ بودوه،
تافي سابيت فواق موله اڪو ترفقسا ڪنا بوات بالسني. سوڱ ۲
فواق مو هق ڪنا فيرا نام ڪو. ڪران ولواورڱ ڪات اڪو تاءِ برڪون
سڪالي فون، تافي اڪو تاءِ ڪورڱ سڪارا فد اورڱ ۲ هق ڪات، ري
هق فيسيد باوا تيته ربي تو.
- 12 سموا تندا هق بري تنبتو ڪات اڪو باوا تيته المسيح، اڪو
ڪاچڻ بوات جوڳ، دافن مات فواق مو، بري مو نمفق ڪواس
توهن.
- 13 فواق مو دڪورينتوس ڪورڱ مان فد اورڱ ۲ فواق المسيح دتمفت
لائين؟ تاءِ ڪورڱ، ملينڪن سڪارا ساج، ياءِ يت اڪو تاءِ بياس امبيق
اوفه دغن فواق مو. مينتاءِ معافله، اڪو بري مو ڪورڱ بالستو!
14 لاني اڪو دوق چادڱ سيف ده، نق ڪي تيغوق مات فواق مو ڪالي
يغ ڪنيگ. فس، ڪالي ني فون، اڪو تاءِ سير امبيق اوفه دغن
فواق مو جوڳ. هق اڪو نق، هاتي موله، بوڪن بارڱ ۲ مو.
انق ۲ تاءِ سوڱ سيمفن دويت تاروه ڪا فق. سوڱ ۲ فق تاروه
15 ڪا انق. اڪو ريلاتولوغ فواق مو سڪت هق اڪو اد، سمفي اڪو
سره ڊيري ڪو فون، اصل فواق مو بولي ه فائده. سابيت اڪو
ڪهور ۲ باپ ڪاسيه ڪا فواق مو بالسني، سوڱ ڪه، فواق مو
نق ڪهور ۲ ڪورڱ ڪاسيه ڪا اڪو؟
- 16 مو بولي ه ستوجو، بوڪن، ڪات اڪو تاءِ بياس امبيق اوفه اف ۲
دغن فواق مو. تافي، بڱڪالي اد اورڱ دالم فواق مو، نق ڪات
اڪو ڪيچي ڪيليق نق تيفو مو، نق بري ماسوق فرڱڪف. مو
17 بياس دغر ڪه، اڪو چاري نق بري بولي ه لاب د فواق مو ڪو
جالن اورڱ هق اڪو سوروه ڪي ڪا تمفت مو تو؟ تنبتو مو تاءِ بياس!
18 نيتوس ڪي تو، سابيت اڪو مينتاءِ جوڳ ۲ دغن ري. فس اد يق

سٽورغ لاکي تو، اڪو سوروه کي بوات تمن دي. تيتوس که، هق چاري نق بري بوليه لاب رفواق مو؟ دق! اڪو دغن دي دوق سکالي، ستوجو سعمور.

- 19 فواق مو شک هاتي لاکي که، کات اڪو دوق فيرا نام کو دافن فواق مو؟ دق! اڪو هق دوق سهاتي دغن المسيح، دوق کيچيق دافن توهن. تافي، اديق براديق کو، هق اڪو کاسيه سوغگوه! توجوان سموا هق اڪو کيچيق ني، نق بري فواق مو بوليه حاصل. اڪو بيمبغ کات بيلا اڪو کي تيغوق مات مو نون، تاکوت فواق 20 مو برتوکر چورق، تاء سروف دغن هق اد رالم هاتي کو. بڻکالي اڪو فون سروف تو جوگ. تاکوت نق جايي کلاهي باله، برديگي مو اڪو، نق فاکت ناءڪ موريه، دوق سبله جمله، کيچيق مفهودوه بالاڳ مات، نق سومبوغ، فس جادي کاجو بيرو. فس اڪو بيمبغ جوگ، کات کالي دافن هق اڪو نق کي کاتمت 21 مو نون، توهن نق بري اڪو مالو کران مو، فس اڪو نق کنا براس سايو، کران بايق اورغ رالم فواق مو هق بوات دوسا ده، تافي تاء سير توبه فد هق دي بوات تو، هق چمر، هق جافوغ، هق تاء سوغ اورغ بوات.

ننتي فولوس نق بري پات کواس المسيح

باب 13

- 1 نيله کالي يڻ کتيگ، هق اڪو نق کي تيغوق مات مو. ايکوت ايات رالم کتاب، اورغ هق نق ادو کات ساله، مستي کنا اد سقسسي، دوا تيگ اورغ.
- 2 فد ماس اڪو دوق سکالي دغن مو، کالي يڻ کدوا تو، اڪو بري مو امران کات، کالي دافن اڪو تاء ليه کسياغ ده، کاورغ ۲ هق دوق بوات ساله. لاني فون، بلوم فد سمفي لاکي، اڪو نق بري فواق تو، اتوا اورغ ۲ لائين فون، ايغت کا امران کو تو.
- 3 فواق مو هق دوق چاري تندا کات المسيح دوق کيچيق کو اڪو

ننتي کالي دافن، نق تمو تنداً تو. المسيح تاء جاري لمه ترهاف فواق مو، تافي نق تنجوق کواس ري تو.

4 سوغکوه فون نمفق کات لمه، تکه ري کنا حکوم بونوه رکايو امفت چايغ تو، تافي لاني ري دوق هيديوف نق بري پات کواس توهن. بالس تو جوگ، اکو هق دوق سهاتي سپاوا دغن المسيح، بياس بري نمفق کات لمه، تافي کالي دافن، بيلا اکو دوق بيچارا کا فواق مو، اکو نق بري پات کات اکو دوق سکاالي دغن المسيح، فس مو نق تيغوق کواس ري.

فسنن ۲ فولوس هق سود

5 فريقساله ديري مو سنديري ماسيغ ۲، تيغوق کجت کا دق ايمان مو. تنشو مو بوليه يقين کات عيسى المسيح دوق رالم هاتي مو. کالو مو تاء ليه يقين بالس تو، معنائ ايمان مو فلسوره. اکو هارف کات فواق مو نق بوليه تاهو کات اکو ني تاء فلسو ده!

7 اکو بردها دغن توهن تاء سير بري مو بوات دوسا لاگي. بوکن اکو نق بوليه تنداً کات اکو ني فندي، دق! اکو نق بري فواق مو بوات هق سبئر، بلرله اورغ کات اکو فلسو فون. کران اکو تاء ليه لاون دغن هق سبئر تو، کنا ستوجو سعمور.

8 اکو بوليه براس سوک هاتي، ولو اورغ کات لمه فون، اصل ايمان فواق مو کجت سوغکوه. هق اکو دوق بردها تو، نق بري مو کهور ۲ سمفرن فرهابييس هق ساله.

10 دغن سابيت نيله، اکو توليس سورت ني، تکه اکو دوق جائوه فد مو، انتوق تاء کنا ار بوکو، تکه اکو ماري نون. اکو نق فاگي کواس هق ربي بري کا اکو، دغن توجوان نق بري فواق مو دوق سيوسون موليق، بوکن نق بري سليرق.

11 هي اريق براديق کو! هق سود ني، اکو نق بري سلامت

تيڱل ڪا فواق مو. ٻاڻيڪيله مو اڪو بري موليق. فس ايغتله
 ڪا هق اڪو روپت ده تو. دوق سهاتيله مو اڪو، دغن سنڱ
 ليندڱ، فس توهن هق اصلڻ بري ڪاسيه دغن سنڱ ليندڱ تو،
 نق دوق اد سڪالي دغن فواق مو.

12 ڪيريم سلامه مو اڪو، دغن ڪوچوف، سروف اديق براديق هق

13 سجاتي. سموا اورڱ هق جادي ميليق توهن باليق ني، ڪيريم

ڪاسيه ڪا فواق مو باليق نون.

14 مينتاء له بري رحمة هق رڻي عيسى المسيح چوچور سمور،

دغن ڪاسيه هق اصل ماري دتوهن تو، دغن ڪواس هق روح

توهن بري انتوق بوليه برهوبوڱ رحيم مو اڪو ڪو توهن،

تورون دوق اتس فواق مو سموا !